

Muhammad al-Xorazmiy nomidagi Toshkent axborot texnologiyalari universiteti doktoranti Alisher Berdiyev tabiiy fanlar, axborot texnologiyalari va boshqaruv yo'nalishi bo'yicha O'zbekiston Respublikasi Prezidentining davlat stipendiyasini qo'lga kiritgan edi.

Kuni kecha stipendiantlarga **“Prezident stipendiyasi guvohnomalari” tantanali tarzda topshirildi.**

Eslatib o'tamiz: Berdiyev Alisher Alikulovich 2006-2010-yillarda Toshkent axborot texnologiyalar universitetining “Radioaloqa, radioeshittirish va televideniye” fakulteti bitiruvchisi. Talabalik davrida universitet qoshida ochilgan “Javaxarlal Neru” nomidagi yosh dasturchilar kursini tugatgan. 2010-2012-yillarda TATU RRT fakulteti “Raqamli televideniye va radioeshittirish” yo'nalishini a'lo baholar bilan tugatib, magistr darajasiga erishgan.

2014-yilda Janubiy Koreaning Seul milliy fan va texnologiyalari universitetining “Next Generation Broadcasting Technique”, 2019-yilda Avstriyaning Klagenfurt universitetining “Nonlinear Dynamical Systems: Modeling, Simulation and CNN-based Computing” nomli maxsus kurslari tinglovchisi.

2017-2018-yillarda Toshkent axborot texnologiyalari universiteti qoshidagi universitet akademiklari, axborot texnologiyalari va kommunikatsiyalari sohasining yirik korxona va tashkilotlarining raxbariyati, tajribali mutaxassisleri va yosh olimlarning jamoat tashkiloti bo'lib, ilmiy-tadqiqot va ijod bilan shug'ullanuvchi yoshlarni birlashtirish, ularni ilmiy-tadqiqot faoliyatiga tizimli asosda yo'naltirish, mavjud ilmiy maktablar an'analarini davom ettirish hamda yangi ilmiy maktablarni shakllantirishga zamin yaratish, yosh olimlar kasbiy va ijtimoiy-maishiy miqyosdagi ilmiy ijodiy faoliyatini qo'llab-quvvatlash, universitetda fundamental, amaliy va innovatsion tadqiqotlarni rivojlantirish orqali ta'lim sifatini oshirish va shu tarzda ilmiy kadrlar tayyorlashning barqaror rivojlanishini ta'minlash hamda yosh olimlar ijodiy yutuqlarini targ'ib qilishda ko'maklashish vazifalarini amalga oshirishga xizmat qiladigan “Yosh olimlar kengashi” kotibi.

Oliy Attestatsiya komissiyasining falsafa doktori (PhD) dissertatsiyalari asosiy ilmiy natijalarni chop etishga tavsiya etilgan “Muhammad al-Xorazmiy avlodlari” nomli ilmiy-amaliy va axborot-tahliliy jurnali bosh muharrir yordamchisi, tahririyat kengashi a'zosi.

Erasmus+ dasturi doirasidagi “Intelligent transport systems: new ICT – based master's curricula for Uzbekistan (INTRAS)”, “New study program in space systems and communications engineering (SPACECOM)” kabi xalqaro loyihalar ishtirokchisi.

Radiotexnika, radionavigatsiya, radiolokatsiya va televideniye tizimlari va qurilmalari, Mobil, tola-optik aloqa tizimlari ixtisosligi bo'yicha 1 ta monografiya, 5 ta xalqaro e'tirof etilgan maqola (Scopus), 13 ta respublika miqyosidagi maqolalar va 20dan ortiq tezislar muallifi.

Hozirda **“Yer qatlami holatini optik-tolali o'lchov tizimlari asosida radiomonitoring qilish usullarini ishlab chiqish”** mavzusida ilmiy ish ustida izlanish olib bormoqda.

Ilmiy rahbari — “O'zbekistonda Respublikasida xizmat ko'rsatgan aloqa xodimi”, “Xizmat ko'rsatgan faxriy radiochi”, O'zbekiston Respublikasi mustaqilligining ko'krak nishondori, “Xalqaro aloqa akademiyasining Oltin medali sovrindori”, “Xalqaro axborotlashtirish akademiyasining akademigi” t.f.n. dotsent Raximov Toxir G'ofurovich.

2020-yil 24 sentabrdagi TATU Ilmiy kengashining qaroriga muvofiq Berdiyev Alisher Aliqulovich o'zining dissertatsiya ishi 70% foizga tayyorligi, malakaviy imtihonlarni a'lo darajada topshirganligini inobatga olib, O'zbekiston Respublikasi tayanch doktorantlari o'rtasida Prezident stipendiyasi tanlovida ishtirok etish uchun nomzod sifatida tavsiya etilgan edi.

A.A.Berdiyev Vazirlar Mahkamasining “O'zbekiston iqtidorli yoshlarini taqdirlash va moddiy rag'batlantirish to'g'risida” 2008-yil 13 oktabrdagi 226-son qaroriga asosan OTM tayanch doktoranturasining doktorantlar o'rtasida O'zbekiston Respublikasi Prezidenti stipendiyasi tanlovida Davlat test markazida o'tkazilgan

axborot texnologiyalari, O'zbekiston tarixi va ingliz tili (CEFR) bo'yicha maxsus testdan muvaffaqiyatli o'tdi.

Oliy ta'lim vazirligi tomonidan tashkil etilgan maxsus komissiya o'tkazgan suhbat jarayonida eng ko'p ovoz to'plagan nomzod sifatida topildi.

O'zbekiston Respublikasi Oliy va o'rta maxsus ta'lim vazirligining 2021-yil 22-yanvardagi 1/1 sonli Hay'at qarori bilan Berdiyev Alisher Aliqulovich *Tabiiy fanlar, axborot texnologiyalari va boshqaruv yo'nalishi* bo'yicha O'zbekiston Respublikasi Prezidenti stipendiyasi sohibi bo'ldi.

TATU matbuot xizmati